

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

宋

謝康樂

第五十冊

v. 50

懽
樂
集

謝康樂集

謝康樂集題詞

謝琰不慧乃生客兒車騎先大笑之
宋公受命客兒稱臣夫謝氏在晉世
居公爵凌忽一代無其等匹何知下
伾徒步廼作天子客兒比肩等夷低
頭執版形跡外就中情實垂文帝繼

緒輕戮大臣與謝侯無夙昔之知綢繆之託重以孟顗扇謗彭城墜淵尋山陟嶺伐木開徑盡錄罪狀其自訟表有云未聞俎豆之學欲爲逆節山棲之士而構陵上言最明痛不免棄市蓋酷禍造於虛聲怨毒生於異代

以衣冠世臣公侯才子欲倔強新朝
送齒丘壑勢誠難之予所惜者涕泣
非徐廣隱遯非陶潛而徘徊去就自
殘形骸孫登所謂抱歎於稽生也山
居賦序廢張左尋臺皓致在去飾取
素宅心若此何異秋水齊物詩冠江

左世推富艷以予觀之吐言天拔政
繇素心獨絕耳客好佛經其辯宗論
曇隆誅又皆祇洹奇趣道門閣筆彼
出處語默無一近人予固知其不殺
不止牽犬聽鶴追松鼓棹均無累其
本度也

婁東張溥題

宋謝康樂集目錄

卷一

賦

山居賦

并自註

撰征賦

歸塗賦

羅浮山賦

嶺表賦

怨曉月賦

長谿賦

江妃賦

又

入道至人賦

逸民賦

辭祿賦

感時賦

孝感賦

傷已賦

表

勸伐河北表

謝封康樂侯表

詣闕上表

牋

與廬陵王牋

書

答范光祿書

又

答王衛軍問辨宗論書

與弟書

答弟書

答綱琳二法師書

志

遊名山志

論

辨宗論

問答附

頌

無量壽佛頌

贊

王子晉讚

巖下見一老翁四五少年讚

維摩經十譬贊

聚沫泡合

燄

芭蕉

聚幻

夢

影響合

浮雲

電

侍汎舟贊

和范光祿祗洹像讚三首

并序

佛讚

菩薩讚

緣覺聲聞合讚

銘

佛影銘

有序

書帙銘

七

七濟

誄

宋武帝誄

宋廬陵王誄

曇隆法師誄

廬山慧遠法師誄

卷二

樂府

善哉行

隴西行

日出東南隅行

長歌行

苦寒行

豫章行

相逢行

折楊柳行二首

泰山吟

君子有所思行

悲哉行

會吟行

緩歌行

燕歌行

鞠歌行

順東西門行

上留田行

詩

三月三日侍宴西池詩

述祖德詩二首

有序

九日從宋公戲馬臺集送孔令

從遊京口北固應詔

永初三年七月十六日之郡初發都

鄰里相送至方山

過始寧墅

富春渚

七里瀨

晚出西射堂

登池上樓

遊南亭

遊赤口進帆海

登江中孤嶼

登永嘉綠嶂山詩

郡東山望溟海詩

遊嶺門山詩

石室山詩

登上戍石鼓山詩

行田登海口盤嶼山

白石巖下徑行田

齋中讀書

命學士講書

種桑詩

初去郡

田南樹園激流植援

石壁精舍還湖中作

登石門最高頂

石門新營所住四面高山迴溪石瀨茂竹

修竹

於南山往北山經湖中瞻眺

從斤竹澗越嶺溪行

過白岸亭

夜宿石門

南樓中望所遲客

廬陵王墓下作

還舊園作見顏范二中書

酬從弟惠連五章

登臨海嶠初發疆中作與從弟惠連可見

羊何共和之四章

初發石首城

入東道路詩

道路憶山中

入彭蠡湖口

入華子岡是麻源第三谷

發歸瀨三瀑布望兩溪

初往新安桐廬口

擬魏太子鄴中集詩八首

并序

魏太子

王粲

陳琳

徐幹

劉楨

應瑒

阮瑀

平原侯植

石壁立招提精舍

過瞿溪山僧

七夕詠牛女

彭城宮中直感歲暮

歲暮

作離合

登廬山絕頂望諸嶠

夜發石關亭

答惠連

初發入南城

東陽溪中贈答二首

送雷次宗

大林峯

枏溪詩

登石室飭僧詩

泉山詩

自叙

臨終詩

附錄

本傳

謝康樂集目錄終

宋謝康樂集卷之一

宋陳郡謝靈運客兒著

明 太倉張 溥評閱

賦

山居賦

自注

古巢居穴處曰巖棲，棟宇居山曰山居。在林野
曰丘園，在郊郭曰城傍。四者不同，可以理推。言
心也。黃屋實不殊於汾陽，卽事也。山居良有異
乎市廛。抱疾就閑，順從性情，敢率所樂，而以作

賦。楊子雲云。詩人之賦麗。以則。文體宜兼。以成其美。今所賦既非京都宮觀。遊獵聲色之盛。而敘山野草木。水石穀稼之事。才乏昔人。心放俗外。詠於文。則可勉而就之。求麗邈以遠矣。覽者。廢。張。左。之。艷。辭。尋。臺。皓。之。深。意。去。飾。取。素。儻。值其心耳。意實言表。而書不盡遺迹。索意託之有賞。其辭曰。

謝子卧病山頂。覽古人遺書。與其意合。悠然而笑曰。夫道可重。故物爲輕。理宜存。故事斯忘。古

今不能革。質文咸其常。合宮非縉雲之館。衢室
豈放勛之堂。邁深心於鼎湖。送高情於汾陽。嗟
文成之却粒。願追松以遠遊。嘉陶朱之鼓棹。廼
語種。以免憂。判身名之有辨。權榮素其無留。孰
如牽犬之路。既寡聽鶴之塗。何由哉。理以相得
爲適。古人
遺書。與其意合。所以爲笑。孫權亦謂周瑜公瑾
與孤意合。夫能重道則輕物。存理則忘事。古今
質文。可謂不同。而此處不異。縉雲放勛。不以天
居爲所樂。故合宮衢室。皆非淹留。鼎湖汾陽。乃
是所居之。文成張良。却粒棄人間事。從赤松子
遊。陶朱范蠡。臨去之際。亦語文種云云。謂二賢
既權榮素。故身名有判也。牽犬李斯之歎。聽鶴
陸機領成都衆大敗後。云思聞華亭鶴唳。不可

復得。若夫巢穴以風雨貽患。則大壯以棟宇祛弊。

宮室以瑤璇致美。則白賁以丘園殊世。惟上託

於巖壑。幸兼善而罔滯。雖非市朝。而寒暑均和。

雖是築構。而飭朴兩逝。易云上古穴居野處。後世聖人易之以宮室。上

棟下宇。以蔽風雨。蓋取諸大壯。璇堂自是素。故曰白賁。最是上爻也。此堂世異矣。謂巖壑道深

於丘園而不爲巢穴。斯免暑之適。雖是築構。無妨非市朝云云。昔仲長願

言流水高山。應璩作書。却阜洛川。勢有偏側。地

闕。周員銅陵之奧。卓氏克銀槐之端。金谷之麗

石子致音微之觀。徒形域之薈蔚。惜事異於栖

石。子致音微之觀。徒形域之薈蔚。惜事異於栖

盤至若鳳翥二臺。雲夢青丘。漳渠淇園。橘林長洲。雖千乘之珍苑。孰嘉遯之所遊。且山川之未備。亦何義於兼求。仲長子云。欲使居有良田。廣宅。在高山流水之畔。溝池自環。竹木周布。塲園在前。果園在後。應璩與程文信書云。故求道田。在關之西。南臨洛水。北據邱山。託崇岫以爲宅。因茂林以爲蔭。謂二家山居不得周員之美。楊雄蜀都賦云。銅陵衍。卓王孫採山鑄銅。故漢書貨殖傳云。卓氏之臨邛。公擅山川。楊雄方言。梁益之間。裁木爲器。曰鋸。裂帛爲衣。曰幌。金谷石季倫之別廬。在河南界。有山川林木池沼水碓。其鎮下邳時。過遊賦詩。一代盛集。謂二地雖珍麗。然制作非栖盤之意也。鳳臺秦穆公時。秦女所居。以致蕭史。叢臺趙之崇館。張衡謂趙築叢臺於前。楚建章華於後。楚之雲夢大中。居長飲賦。楚靈王遊雲夢之中。息

於荆臺之上。前方淮之水。左洞庭之波。右顧彭蠡之濤。南望巫山之阿。遂造章華之臺。亦見諸史。淮南青丘。齊之海外。皆獵所。司馬相如云。秋田乎青丘。徬徨乎海外。漳渠史起爲魏文侯所造。溉水之所。淇園衛之竹園。在淇水之澳。詩人所載。橘林蜀之園林。楊子雲蜀都賦亦云。橘林左太冲謂戶有橘柚之園。長洲吳之苑囿。左亦謂之長洲。之茂苑。因江海洲渚以爲苑囿。

故表此園之珍靜。千乘讌嬉之所。

非幽人憇止之鄉。且山川亦不能兼茂。隨地勢所遇。覽明達之撫運。乘機緘而理默。指歲暮而耳。

歸休詠宏徽於刊勒。狹三閭之喪江。矜望諸之

去國。選自然之神麗。盡高棲之意得。

余祖車騎建大功淮

肥江左得免橫流之禍。後及太傅既薨。建圖已輟。於是便求解駕東歸。以避君側之亂。廢興隱

顯。當是賢達之心。故選神麗之所。以仰前哲之

申。高棲之志。經始山川。實基於此。

遺訓。俯性情之所便。奉微軀以宴息。保自事以

乘。閑愧班生之夙悟。慙尚子之晚研。年與疾而

偕來。志乘拙而俱旋。謝平生於知遊。棲清曠於

山川。謂經始此山。遺訓於後也。性情各有所便。山居是其宜也。易云向晦入宴息。莊周云

自事其心。此一是其所處。班嗣本不染世。故曰夙悟。尚平未能去累。故曰晚研。想遲二人。更以

年衰疾至。志寡求拙。日事并可山居。日與知遊別。故曰謝平生。就山川。故曰棲清曠。其居

也。左湖右江。往渚還汀。面山背阜。東徂西傾。抱

含吸吐。款跨紆縈。縣聯邪亘。側直齊平。枚乘曰。左江右

賦

湖其樂無有此吳客說楚公子之詞當謂江都之野彼雖有江湖而乏山巖此憶江湖左右與之同而山嶽形勢池城所無也往渚還汀謂四面有水而山背阜亦謂東西有山便是四水之裏也抱含吸吐謂中央復有川款跨紆縈謂邊背相連帶迂回處謂之邪亘平正處謂之側直近東則上田下湖西谿南谷石塢石滂閔硯黃竹決飛泉於百仞森高薄於千麓寫長源於遠江派深茫於近瀆

上田在下湖之水口名爲田口下湖在田之下下處並有

名山川西谿南谷分流谷鄣水畎入田口西谿水出宜縣西谷鄣是近出之最高峰者西溪便是之背入西谿之裏得石塢以石爲阻故謂爲塢石滂在西谿之東從縣南入九里兩面峻峭數十丈水自上飛下北至外谿封塢十數里皆飛流迅激左右巖壁緣竹閔硯在石滂之東

谿，逶迤下注良田。董竹
與其連南界莆中也。

近南則會以雙流，縈以

三洲，表裏回游，離合山川，崿崩飛於東峭，槃傍

薄於西阡，拂青林而激波，揮白沙而生漣。

雙流謂剡

江及小江，此二水同會於山南，便合流注下。三洲在二水之口，排沙積岸，成此洲漲，表裡離合，

是其貌狀也。崿者，謂回江岑在其山居之南界，有石跳出，將崩江中，行者莫不駭慄。槃者，是縣

故治之所在江之

用槃石

近西則楊賓接

竟渚，竝帶青林而連白沙也。峰，唐皇連縱，室壁帶谿，曾孤臨江，竹緣浦以被

綠，石照澗而映紅，月隱山而成陰，木鳴柯以起

風。

楊中元賓並小江之近處與山相接也。唐皇便從北出室，石室在小江口，南岸壁小江北

岸並在楊中之下。壁高四十丈。色赤。故曰照瀾。而映紅。曾山之西。孤山水南。王子所經始。臨江皆被以綠竹。山高月隱。便謂爲陰。鳥集柯鳴。便謂爲風也。近北則二巫結湖。

兩習通沼。橫石判盡。休周分表。引修隄之逶迤。

吐泉流之浩漾。山巉下而回澤。瀨石上而開道。

大小巫湖。中隔一山。外習周回在圻西北邊。浦出江。並是美處。義熙中王穆之居大巫湖。經始處。所猶在。兩習皆長溪。外習出山之後。四五里許。裏習亦隔一山。出新塚橫山野舍之北面。常石野舍之西北。巫湖舊唐。故曰修隄。長谿甚遠。故曰泉流。常石磯。故曰下巉。而回澤。

裏習漫石數里。水從上過。故曰瀨石。上而開道。休山東北周里。山在休之南。並是北邊。遠。

東則天台桐栢。方石太平。二韭四明。五輿三菁。

表神異於緯牒，驗感應於慶靈，凌石橋之莓苔，

越檣谿之紆縈，

天台桐栢七縣餘地，南帶海，二非四明五輿皆相連接，奇地所

無高於五嶽，便是海中三山之流，非以萊爲名，四明方石四面自然開窓也，五輿者，曇濟道人蔡氏、郗氏、謝氏、陳氏各有一輿，皆相倚角，並是奇地。三菁，太平之北，天台之始，方石直上萬丈，下有長谿，亦是縉雲之流，云此諸山並見圖緯，神仙所居，往來要徑，石橋過檣谿，人跡之艱，不復過此也。遠南則松箴棲雞，唐嵒漫石，崒崒對嶺，

崒孟分隔，入極浦而邐回，迷不知其所適，上嶽

寄而蒙籠，下深沈而澆激，

棲雞在保口之上，別浦入其中，周回甚深，

四山之裏，松箴在棲雞之上，緣江唐嵒入太平水路，上有瀑布數百丈，漫石在唐嵒下，郗景興

經始精舍。亦是名山之流。崕崕與分界。去山八
十里。故曰遠南。前嶺鳥道。正當五十里高。左右
所無。就下地形高。乃當不稱。遠望崕山甚奇。謂
白爍尖者最高。下有良田。王敬弘經始精舍。墨
濟道人住孟山。名曰孟塿。芋薯之膠田。清溪秀
竹。迴開巨石。有趣之極。此中多諸浦。澗傍依茂
林。迷不知所通。嶽崎深遠。西則缺四十四字
沈處。處處皆然。不但一處。

遠北則長江永歸。巨海延納。崑漲緬曠。島嶼綢
沓。山縱橫以布護。水迴沈而縈浥。信荒極之綿
眇。窵風波之睽合。江從山北流。窮上虞界。謂之
三江口。便是大海。老子謂海

爲百谷王。以其善處下也。海人謂孤山爲崑薄
洲有山謂之島嶼。卽洲也。漲者沙始起將欲成
嶼。縱橫無常於一處。廻沈相縈擾也。大徒觀其
荒東極故爲荒極。風波不恒爲。聯合也。南術之
生。巖。成衍。緣岸測深相渚。

知淺洪。濤滿則曾石沒。清濶減則沈沙顯。及風
興。濤作。水勢奔壯。于歲春秋在月朔望。湯湯驚
波。滔滔駭浪。電激雷崩。飛流灑漾。凌絕壁而起
岑。橫中流而連薄。始迅轉而騰天。終倒底而見
壑。此楚貳心醉於吳客。河靈懷慙於海若。南術是其
臨江舊宅。門前對江。三轉曾山路。窮四江對岸。
西面常石。此二山之間。西南角岸孤山。此二山

皆是狹處故曰生機勇門以南上便大間故曰成衍岸高測深渚下知淺也江中有孤石沈沙隨水增減春秋朔望是其盛時故枚乘云楚太子有疾吳客問之舉秋濤之美得以瘳病太子國之儲貳故曰楚貳河靈河伯居河所謂爾其河靈慚於海若事見莊周秋水篇

舊居曩宅今園枌槿尚援基井具存曲術周乎

前後直陌矗其東西豈伊臨谿而傍沼迺抱阜

而帶山考封域之靈異實茲境之最然葺駢梁

於巖麓棲孤棟於江源敞南戶以對遠嶺闢東

窓以矚近田田連岡而盈疇嶺枕水而通阡葺室

在宅裏山之東麓東窓矚田兼見江山之美三間故謂之駢梁門前一棟枕巖上存江之嶺南

對江上遠嶺此二館屬望殆無優劣也

阡陌縱橫塍埒交經導

渠引流脉散溝并蔚蔚豐秋苾苾香秔送夏蚤

秀迎秋晚成兼有凌陸麻麥粟菽候時占節遞

藝遞熟供粒食與漿飲謝工商與衡牧生何待

於多資理取足於滿腹

許由云偃鼠飲河不過滿腹謂人生食足則歡

有餘何待多須邪工商衡牧似多須者若自園少私寡欲克命則足但非田無以立耳

之田自田之湖泛濫川上緬邈水區濬潭澗而

窈窕除菰洲之紆餘悲溫泉於春流馳寒波而

秋徂風生浪於蘭渚日倒影於椒塗飛漸榭於

中沚。取水月之歡娛。且延陰而物清。夕棲芬而

氣敷。顧情交之永絕。覲雲客之暫如。

此皆湖中之美。但患

言不盡意。萬不寫一耳。諸澗出源入湖。故曰濬潭澗。澗長是以窈窕。除菰作洲。洲言所以紆餘也。

水草則萍藻蒹葭。藿蒲芹蓀。蒹葭蘋蘩。薺荇

菱蓮。雖備物之偕美。獨扶渠之華鮮。播綠葉之

鬱茂。含紅敷之續翻。怨清香之難留。矜盛容之

易闌。必克給而後奉。豈蕙草之空殘。卷斂弦之

逸曲。感江南之哀歎。秦箏倡而溯游往。唐上奏

而舊愛還。

舉出離騷。斂弦是采菱歌。江南是相和曲。云江南采蓮。秦箏唱蒹葭篇。唐

上奏蒲生詩。皆感物致賦。魚藻蘋蘩荇。亦有詩人之詠。不復具叙。

本草所載山

澤不一。雷桐是別。和緩是悉。參核六根。五華九

實。二冬並稱。而殊性。三建異形。而同出水。香送

秋。而擢蒨林蘭。近雪而揚猗。卷栢萬代而不殞。

伏苓千歲。而方知映紅葩於綠蒂。茂素蕤於紫

枝。既住年而增靈。亦驅妖而斥疵。

本草所出藥處。於今不復

依。隨土所生耳。此境出藥甚多。雷公桐君古之

采藥。醫緩古之良工。故曰別悉。參核者。雙核桃

杏仁也。六根者。苟七根。五茄根。葛根。野葛根。

根也。五華者。董華。芫華。樾華。菊華。旋覆華也。九

實者。連前實。槐實。栢實。兔絲實。女貞實。蛇床實。

蔓荆實。蓼實。實也。二冬者。天門。麥門冬。三建

者附子、天雄、烏頭、水香、蘭草、林蘭、支子、卷栢、伏苓、並皆仙物。凡此衆藥，事悉見於神農。其

竹則二箭殊葉，四苦齊味。水石別谷，巨細各彙。既修竦而便娟，亦蕭森而蓊蔚。露夕沾而淒陰，風朝振而清氣。互捎雲以拂杪，臨碧潭而挺翠。茂上林與淇澳，驗東南之所遺。企山陽之游踐，

遲鸞鷖之棲託。憶崑園之悲調，慨伶倫之哀籥。衛女行而思歸，詠楚客放而防露。作

二箭一者苦箭大葉

一者筭箭細葉，四苦青苦、白苦、紫苦、黃苦、水竹、依水生，甚細密。吳中以爲宅，援石竹本科。叢大以克屋懷。巨者竿挺之屬，細者無箐之流也。修竦便娟，蕭森蓊蔚，皆竹貌也。上林、關中之禁苑。

淇澳衛地之竹園方此皆不如東南會稽之竹
箭唯此地最富焉山陽竹林之游鸞鷟棲食之
所崑山之竹任爲笛黃帝時伶倫斬其厚均者
吹之爲黃鍾之宮衛女思歸作竹竿之詩楚人
放逐東方朔感其木則松栢檀欒桐榆櫟栢
江潭而作七諫

穀棟楸梓檉櫟剛柔性異貞脆質殊卑高沃瘠
各隨所如榦合抱以隱岑杪千仞而排虛凌岡
上而喬竦蔭澗下而扶疏沿長谷以傾柯攢積
石以插衢華映水而增光氣結風而回敷當嚴
勁而蔥蒨承和煦而芬腴送墜葉於秋晏遲含
萼於春初

皆木之類選其美者載之山脊曰岡
岡上澗下長谷積石各隨其方離騷

字林音。詩云。錦衾有爛。故云錦爛。鱸。鮓。乘時。魚。鰕。音感。鰕。音迅。皆出谿中。口上。恒以爲鰕。

則鷗鴻鵠鶩鴛鴦鳩鵲鷄鵲繡質鶴鶴綬章晨

鳬朝集。時鵲山梁海鳥違風朔。禽避涼。萬生歸。

北霜降客南接響雲漢侶宿江潭聆清哇以下

聽載王子而上參薄回涉以弁翰映明壑而自

此鵠音昆。鴻音洪。鶩音湍。鶩音路。鵠音退。飛字如

相。唐公之馬，與此鳥色同。故謂爲鴈。音相。鷄鵲。

相庸。互之。黑與此鳥色同。故謂爲相音。朴彩。鶉鶉鳥。見張茂先博物志。鶉音翟。亦雉之美者。此

四鳥並美牙質鳥音符里鴨也常待鵠而飛喬音已消反長尾雉也論語云山梁雌雉時哉時

哉。海鳥爰居。文仲不知其鳥以爲雁也。事見左傳。朔禽雁也。寒月轉往衡陽。禮記霜始降。雁

來賓歲暮云雁北向。政是陽初生時。萸生山上。歸北。霜降客南山。映水。自翫其羽儀者。

則援猓狸獾。犴猓狎猛。山下則熊羆豺虎。獬廌

麋廌擲飛枝於窮崖。踔空絕於深研。蹲谷底而

長嘯。攀木杪而哀鳴。

援音袁。猓音鬼。狸音力之。反。獾音火九反。犴音立懸。

反。猓音曼。似獾而長。狼之屬。一曰羆。狎音安黠。

反。猛音弋生反。狸之黃黑者。一曰似狎。豺音在。

皆反。獬音元。野羊大角。麋音鬼。羆反。廌音京。能掉擲。虎長嘯。援哀鳴。鳴聲可翫。

繹綸不。

投。置羅不披。磻弋靡用。蹄筌誰施。鑑虎狼之有

仁。傷遂欲之無崖。顧弱齡而涉道。悟好生之咸

宜。率所由以及物。諒不遠之在斯。撫鷗鰕而悅

豫杜機心於林池。

八種皆是魚獵之具。自少不殺。至平白首。故在山林中而

此歡永廢。莊周云。虎狼仁獸。豈不父子相親。世云。虎狼暴虐者。政以其如禽獸。而人物不自悟其毒害。而言虎狼可疾之甚。苟其遂欲。豈復崖限。自弱齡奉法。故得免殺生之事。苟此悟萬物好生之理。易云。不違復。無祇悔。庶乘此得以入道。莊周云海。人有機心。鷗鳥舞而不下。今無害彼之心。各悅豫於林池也。敬承聖誥。恭窺前經。山野昭曠。聚落羶腥。故大慈之弘誓。拯羣物之淪傾。豈寓地而空言。必有貨以善成。欽鹿野之華苑。羨靈鷲之名山。企堅固之貞林。希菴羅之芳園。雖粹容之緬邈。謂哀音之恒存。建招提於幽峰。冀振錫

之息肩。庶銓王之贈席。想香積之惠餐。事在微

而思通。理匪絕而可溫。

賈誼弔屈原云。恭承嘉惠。敬承亦此之流。聚落

是墟邑。謂歌哭諍訟。有諸誼譁。不及山野。爲僧居止也。經教欲令在山中皆有成文。老子云。善貸且善成。此道惠物也。鹿苑說四真諦處。靈鷲山說般若法華處。堅固林說泥洹處。菴羅園說不思議處。今旁林苑園制苑。彷彿在昔。依然託想。雖粹容緬邈。哀音若存也。招提謂僧不能常住者。可持作坐處也。所謂息肩。銓王香積事出維摩經。論語云。溫故知新。理既不純。更宜復溫。則可待爲已之日用也。

爰初經略。杖策孤征。八澗水涉。登

嶺山行。陵頂不息。窮泉不停。櫛風沐雨。犯露乘

星。研其淺思。罄其短規。非龜非筮。擇良選奇。翦

榛開逕、尋石覓崖、四山周回、雙流逶迤、面南嶺、
建經臺、倚北阜、築講堂、傍危峰、立禪室、臨浚流、
列僧房、對百年之高木、納萬代之芬芳、抱終古
之泉源、美膏液之清長、謝麗塔於郊郭、殊世間
於城傍、欣見素以抱樸、果甘露於道場、云初經略躬自
履行、備諸苦辛也、罄其淺短、無假於龜筮、貧者
既不以麗爲美、所以卽安茅茨而已、是以謝郊
郭而殊城傍、然清虛寂、苦節之僧、明發懷抱、事
寔、實是得道之所也。

紹人徒、心通世表、是遊是憇、倚石構草、寒暑有
移、至業莫矯、觀三世以其夢、撫六度以取道、乘

恬知以寂泊含和理之窈窕指東山以冥期實
西方之潛兆雖一日以千載猶恨相遇之不早

謂曇隆法流二法師也二公辭恩愛棄妻子輕
舉入山外緣都絕魚肉不入口糞掃必在體物
見之絕歎而法師處之夷然詩人西發不勝造
道者其亦如此往石門瀑布中路高棲之游昔
告離之始期生東山沒存西方相遇賤物重已
之欣實以一日爲千載猶慨恨不早棄世希靈駭彼促年愛是長生冀浮丘之誘接
望安期之招迎甘松桂之苦味夷皮褐以頽形
羨蟬蛻之匪日撫雲蜺其若驚陵名山而屢憇
過巖室而披情雖未階於至道且緬絕於世纓

指松菌而興言良未齊於殤彭

此一章叙學仙者雖未及佛道

之高。然出於世表矣。浮丘公。是王子喬師。安期先生。是馬明生師。二事出列仙傳。洞真經云。今學仙者。亦明師以自發悟。故不辭苦味類形也。莊周云。和以天倪。倪者崖也。數經歷名山。遇余巖室。披露其情性。且獲長生。方之松菌殤彭。邈然有間也。山作水役。不以一

牧資待各徒。隨節競逐。陟嶺刊木。除榛伐竹。抽笋自篁。擿筍于谷。楊勝所拈。秋冬蒹藁。野有蔓草。獵涉蓼蓂。亦醞山清。介爾景福。苦以木成。甘以搯熟。慕樵高林。剝笈巖椒。掘蒨陽崖。擿擿陰標。晝見牽茅。宵見索綯。芟菰翦蒲。以薦以芟。旣

坭既埏品收不一其灰其炭咸各有律六月採

蜜八月撲栗備物爲繁略載靡悉此一章謂是山作及水役

採拾諸事也然漁獵之事皆不載楊楊桃也山間謂之木子藟音覆字出字林詩人云六月食

鬱及蕁獵涉字出爾雅木酒味苦播播酒味甘並至美兼以療病播治癰核木治痰冷

甚味似菰菜而勝刊木而作之謂之慕茭音及採以爲紙舊音倩採以爲漂

採蜜樸栗各隨其月也若乃南北兩居水通陸阻觀風瞻

雲方知厥所兩居謂南北兩處各有居止峰嶠阻絕水道通耳觀風瞻雲然後方

知其南山則夾渠二田周嶺三苑九泉別澗五

谷異巘羣峰參差出其間連岫複陸成其坂衆

流漑灌以環近。諸堤擁抑以接遠。遠堤兼陌。近
流開湍。凌阜泛波。水往步還。還回往匝。在渚員
巒。呈美表趣。胡可勝單。抗北頂以葺館。殷南峰
以啓軒。羅曾崖於戶裏。列鏡瀾於窓前。因丹霞
以頽楣。附碧雲以翠椽。視奔星之俯馳。顧
之未牽。鵬鴻翻翥而莫及。何但鷦雀之翩翾。沈
泉傍出。潺湲於東檐。桀壁對峙。砢礧於西霤。修
竹葳蕤。以翳薈。灌木森沈。以蒙茂。蘿蔓延以攀
援。花芬薰而媚秀。日月投光於柯間。風露披清

於嶢岫。夏涼寒燠。隨時取適。階基回互。檮櫺乘
隔。此焉卜寢。翫水弄石。邇卽回眺。終歲罔斃。傷
美物之遂化。怨浮齡之如借。眇遯逸於人羣。長

寄心於雲霓。

南山是開創卜居之處也。從江樓步路。跨越山嶺。綿亘田野。或升或

降。當三里許。塗路所經。見也。則喬木茂竹。綠畛彌阜。橫波踈石。側道飛流。以爲寓目之美觀。及至所居之處。自西山開道。迄于東山。二里有餘。南悉連嶺。疊鄣。青翠相接。雲煙霄路。殆無倪際。從逕入谷。凡有三口。方壁西南。石門世南。池東南。皆別載其事。緣路初入。行於竹逕。半路闊。以竹渠澗。旣入東南。傍山渠。展轉幽奇。異處同美。路北東西路。因山爲鄣。正北狹處。踐湖爲池。南山相對。皆有崖巖。東北枕壑。下則清川如鏡。傾柯盤石。被隰映渚。西巖帶林。去潭可二十

丈許。葺基構宇在巖林之中。水衛石階。開窓對山。仰眺曾峰。俯鏡濬壑。去巖半嶺。復有一樓。迺望周眺。既得遠趣。還顧西館。望對窓戶。綠崖下者。密竹蒙逕。從北直南。悉是竹園。東西百丈。南北百五十丈。北倚近峰。南眺遠嶺。四山周回。溪澗交過。水石林竹之美。巖岫嶺曲之好。備盡之矣。刊翦開築。此焉居處。細趣密翫。非可具記。故較言大勢耳。越山列其表側。傍緬為異。

觀也。因以小湖鄰於其隈。眾流所奏。萬泉所回。汎濫異形。首嵒終肥。別有山水路。邈緬歸。汎濫肥

泉名。事見於詩。云此萬泉所奏。各有形勢。求歸其路。廼界北山。棧道

傾虧。蹬閣連卷。復有水逕。繚繞回員。瀾瀾平湖。泓泓澄淵。孤岸竦秀。長洲芊綿。既瞻既眺。曠矣

悠然。及其二川合流。異源同口。赴隘入險。俱會
山首。瀨排沙以積。丘峰倚渚以起。阜石傾瀾而
捎巖。木映波而結藪。逕南澹以橫前。轉北崖而
掩後。隱叢灌以悉晨暮。託星宿以知左右。往反經過

自非巖澗便是水逕。洲島相對皆有趣也。山川澗石。洲岸草木。旣標

異於前章。亦列同於後贖。山匪岨而是。岨川有
清。而無濁。石傍林而插巖。泉協澗而下谷。淵轉
渚而散芳。岸靡沙而映竹。草迎冬而結葩。樹凌
霜而振綠。向陽則在寒。而納煦。面陰則當暑。而

含雪連岡則積嶺以隱嶙舉峰則羣竦以巖巖

浮泉飛流以寫空沈波潛溢於洞穴凡此皆異

所而咸善殊節而俱悅土山載石曰硯山有林曰岵此章謂山川衆美

亦不必有故總叙其最居山之後事亦皆有尋求也春秋有待朝夕須資

既耕以飯亦桑貿衣藝菜當肴採藥救頽自外

何事順性靡違法音晨聽放生夕歸研書賞理

敷文奏懷凡厥意謂揚較以揮且列于言誠特

此推謂寒待綿纊暑待絺綌朝夕餐飲設此諸業以待之藥以療病又在其外事之相推

自不得不然至於聽講放生研書敷文皆其所好韓非有揚較班固亦云揚較古今其義一也

左思曰爲左右揚較而陳之

北山二園南山三苑百果備列

乍近乍遠羅行布株迎早候晚猗蔚溪澗森疎

崖巘杏壇棕園橘林栗圃桃李多品梨棗殊所

枇杷林檎帶谷映渚堪梅流芬於回巒枰柿被

實於長浦

莊周云漁父見孔子杏壇之上維摩詰經榛樹園揚雄蜀都賦云橘林左

太冲亦云戶有橘柚之園桃李所植甚多棗梨事出北河濟之間淮穎諸處故云殊所也

町所藝含蘂藉芳蓼載蓼薺葑菲蘇薑綠葵眷

節以懷露白薤感時而負霜寒葱標蒨以陵陰

春藿吐茗以近陽

葑菲見詩栢舟中管子曰北伐山戎得寒葱庾闡云寒葱

挺園灌漑自供。弱質難恒。頽齡易喪。撫鬢生悲。不待外求者也。

視顏自傷。承清府之有術。冀在衰之可壯。尋名

山之奇藥。越靈波而憇轅。採石上之地黃。摘竹

下之天門。據曾嶺之細辛。拔幽澗之溪蓀。訪鍾

乳於洞穴。訊丹陽於紅泉。此皆往年之藥。即近山之所出。有採拾欲

以消病也。安居二時。冬夏三月。遠僧有來。近衆無闕。

法鼓朗響。頌偈清發。散華霏糝。流香飛越。析曠

劫之微言。說像法之遺旨。乘此心之一豪。濟彼

生之萬理。啓善趣於南倡。歸清暢於北機。非獨

愿於予情、諒僉感於君子、山中兮清寂、羣紛兮
自絕、周聽兮匪多、得理兮俱悅、寒風兮搔屑、面
陽兮常熱、炎光兮隆熾、對陰兮霜雪、惛曾臺兮
陟雲根、坐澗下兮越風穴、在茲城而諧賞、傳古

今之不滅

衆僧冬夏二時坐、謂之安居、輒九十
日、衆遠近聚萃、法鼓頌偈、華香四種

是齋講之事、析說是齋講之議、乘此之心、可濟
彼之生、南倡者都講、北機者法師、山中靜寂、實
是講說之處、兼有林木、可隨
寒暑、恒得清和、以爲適也。

好生之篤、以我而

觀懼、命之盡、吝景之懽、分一往之仁心、拔萬族

之險難、招驚、寃於殆、化收危、形於將、闌漾水性

於江流吸雲物於天端覩騰翰之頽頽視鼓鯁
之往還馳騁者儻能狂愈猜害者或可理攀

云物

皆好生但以我而觀便可知彼之情吝景懼命
是好生事也能放生者但有一往之仁心便可
拔萬族之險難水性雲物各尋其生老子云馳
騁田獵令人心發狂猜害者恒以忍害爲心見
放生之理或可得悟也哲人不存懷抱誰質糟粕猶在啓

勝剖裘見柱下之經二覩濠上之篇七承未散
之全樸救已頽於道術嗟夫六藝以宣聖教九
流以判賢徒國史以載前紀家傳以申世模篇
章以陳美刺論難以覈有無兵技醫日龜筮筮

夢之法、風角冢宅、筭數律歷之書、或平生之所

流覽、並於今而棄諸、驗前識之喪道、抱一德而

不渝、

莊周云、輪扁語齊桓公、公之所讀書、聖人之糟粕、滕者、金滕之流也、柱下、老子、濠上

莊子、二七、是篇數也、云此二書、最有理、過此以往、皆是聖人之教、獨往者所棄、伊昔齟

齟、實愛斯文、援紙握管、會性通神、詩以言志、賦

以敷陳、箴銘誄頌、咸各有倫、爰暨山棲、彌歷年

紀、幸多暇日、自求諸已、研精靜慮、貞觀厥美、懷

秋成章、含笑奏理、

謂少好文章、及山棲以來、別緣既闌、尋慮文詠以盡暇日

之適、便可得通神會性、以示終朝

若廼乘攝持之告、評養達之

篇畏絕迹之不遠。懼行地之多艱。均上皇之自
昔。忌下衰之在旃。投吾心於高人。落賓名於聖
賢。廣滅景於崆峒。許遁音於箕山。愚假駒以表
谷。涓隱巖以搴芳。庚宅鼎以葆和。興陟嶽而善
狂。萊庇蒙以織春。徐韜魏而采芋。皓棲商而願
志。卿寢茂而敷詞。鄭別谷而永逝。梁去霸而長
噫。高居唐而胥宇。臺依崖而穴墀。咸自得以窮
年。眇貞思於所遺。老子云善攝生者。莊子云謂
之不善持生。又云養生有無
崖達生者不務生之所無奈何。絕迹上皇下衰
賓名義亦皆出莊周。廣成子在崆峒之上。黃帝

之師也。許由隱於箕山，堯以天下讓而不取。愚公居于駒阜，齊桓公逐鹿入山，見之，涓子隱於宕山，好餌術，告伯陽琴心三篇，庚桑楚得老子之道，居崐嵒之山，楚狂接輿，楚王聞其賢，使使者聘之，於是遂遊諸名山，在蜀峨眉山，上徐無鬼巖棲，魏侯勞之，問先生苦山林矣，乃肯見寡人，無鬼問君絀嗜欲，屏好惡，則耳目察矣，常采芋栗，老萊子耕於蒙山之陽，著書十五篇，言道家之事，織春爲業，四皓避秦亂，入商洛深山，漢祖召不能出，司馬長卿高才，而處世不樂，預公卿大事，病免，家居茂陵，鄭子真耕隱谷口，大將軍王鳳禮聘不屈，遂與弟子別於山阿，終身不反，梁伯鸞隱霸陵山中，耕織以自娛，後復入會稽山，臺孝威居武安山下，依崖爲土室，采藥自給，高文通居西唐山，從容自娛也，暨其窈窕幽深，寂寞虛遠，事

與情乖，理與形反，旣耳目之靡端，豈足跡之所

踐蘊終古於三季，俟通明於五眼，權近慮以停

筆，抑淺知而絕簡。

謂此既非人跡所求，更待三

筆絕簡不復多云，冀夫賞音悟夫此旨也。

撰征賦

蓋聞昏明殊位，貞晦異道，雖景度回革，亂多治寡，是故升平難於恒運，剝喪易以橫流。皇晉受命河汾，來遷吳楚，數厯九世，年踰十紀，西秦無一援之望，東周有三辱之憤，可爲積禍纏繫，固以久矣。况乃陵坐幽巖，情敬莫遂，日月推薄，帝

心彌遠，慶靈將升。時來不爽，相國宋公得一居
貞。回乾運軸，內匡寰表。外清遐陬，每以區宇未
統，側席盈慮。值天祚攸興，昧弱授機。龜筮元謀，
符瑞景徵。於是仰祇俯協，順天從兆。興止戈之
師，躬暫勞之討。以義熙十有二年五月丁酉，敬
戒九伐，申命六軍。治兵于京畿，次師于汭上。雲
檣千艘，雷輜萬乘。羽騎盈塗，飛旌蔽日。別命羣
帥，誨謨惠策。法奇於三略，義秘於六韜。所以鉤
棘未曜，殞前禽於金墉。威弧始發，走鉞隼於滑

臺曾不踰月。二方獻捷。宏功懋德。獨絕古今天。
子感東山之勛勞。慶格天之光大。明發興於鑒。
寐使臣遵于原隰。余攝官承乏。謬充殊役。皇華
愧於先雅。靡監額於征人。以仲冬就行。分春反
命。塗經九守。路踰千里。沿江亂淮。溯薄泗汭。詳
觀城邑。周覽丘墳。眷言古迹。其懷已多。昔皇祖
作藩。受命淮徐。道固苞桑。勲由仁積。年月多厯。
市朝已改。永爲洪業。纏懷清厯。於是采訪故老。
尋履往迹。而遠感深慨。痛心殞涕。遂寫集聞見。

作賦撰西征，俾事運遷謝，託此不朽，其詞曰：

系烈山之洪緒，承火正之明光，立熙載於唐后，
申讚事於周王，疇庸命而順位，錫寶珪以徹疆，
厯尚代而平顯，降中葉以繁昌，業服道而德微，
風行世而化揚，投前蹤以永冀，省輜質以遠傷，
睽謀始于蓍蔡，違用舍於行藏，庇常善之罔棄，
憑曲成之不遺，昭在幽而偕煦，賞彌久而愈私，
顧晚草之薄弱，仰青春之歲穠，引蔓頴於松上，
擢纖枝於蘭逵，施隆貸而有渥，報涓塵而無期。

歡太階之休明、穆皇道之緝熙、惟王建國、辨方
定隅、內外旣正、華夷有殊、惟昔小雅、逮于班書、
戎蠻孔熾、是殛是誅、所以宣王用棘、於獫狁、高
帝方事於匈奴、然侵鎬至涇、自塞及平、闕郊伺
鄙、

慕攜王之矯虔、階喪亂之未宐、竊
強秦之三輔、陷隆周之兩京、雄崑澠以制險、據
繞雷而作扃、家永懷於故壤、國願言於先塋、俟
太平之曠期、屬應運之聖明、坤寄通於四瀆、乾
假照於三辰、水潤土以顯比、火炎天而同人、惟

上相之獻哲、當草昧而經綸、總九流以貞觀、協
五材而平分、時來之機悟先於介石、納隍之誠、
一援於生民、龜策允臧、人鬼同情、順天行誅、司
典詳刑、樹牙選徒、秉鉞抗旂、弧矢罄楚、孝之心、
智戈棘單、吳子之精靈、迅三翼以魚麗、襄兩服
以鴈逝、陣未列於都甸、威已振於秦薊、灑嚴霜
於渭城、被和風於洛汭、就終古以比猷、考墳冊
而莫絜、昔西怨於東徂、今并伐而南悲、豈朝野
之恒情、動萬乘之幽思、歌零雨於豳風、興採薇

於周詩慶金墉之凱定眷戎車之遷時伫千里
而感遠涉弘望而懷期詔微臣以勞問奉王命
於河湄夕飲餞以俶裝旦出宿而言辭歲旣晏
而繁慮日將邁而戀乖闕敬恭於桑梓謝履長
於庭階冒沈雲之掩藹迎素雪之紛霏凌結湍
而凝清風矜籟以揚哀情在本而易阜物雖末
而難懷眷余勤以就路苦憂來其城頽爾乃經
雉門啓浮梁眺鍾巖越查塘覽永嘉之素維尋
建武之緝綱于時內慢神器外侮戎狄君子橫

流庶萌分析主晉有祀福祿來格明雨降覽三
七辭厄元誕德以膺緯肇同光於陽宅明思服
於下武興繼代以消逆簡文因心以秉道故恩
用而刑廢孝武捨已以仗賢亦宣外而治內觀
日化而就損庶雍熙之可對閔隆安之致寇傷
龜玉之毀碎漏妖凶於滄洲纏繫難而盈紀時
焉依於晉鄭國有賊於百里賴英謨之經營弘
兼濟以忘已主寰內而緩虞澄海外以清滓至
如昏侵蔽景鼎祚傾基黍離有歎鴻鴈無期瞻

天命之貞，符乘順動而履機，率駿民之思效。普
邦國而同歸，盪積靈之穢氛，啓披陰之光暉。反
平陵之杳藹，復七廟之依稀。務役簡而農勸，每
勞賞而忠甄。燮時雍於祖宗。

掃

遭醜於漢渚，滌僭逆於岷山。羈巢處於西木，引
鼻飲於源淵。惠要襍而思遑，援冠弁而求虔。視
治城而北屬，懷文獻之收揚。匪元首之康哉，孰
股肱之惟良。譬觀曲而識節，似綴組以成章。業
彌纏而彌微，事愈有而莫傷。次石頭之雙岸，究

孫氏之初基幸漢廢之漏網憑江介以抗維初
鵲起於富春果鯨躍於川湄匝三世而國盛歷
五僞而宗夷察成敗之相仍猶唇亡而齒寒載
十二而謂紀豈蜀滅而吳安衆咸昧於謀兆羊
獨悟於理端請廣武以誨情樹襄陽以作藩拾
建業其如遺沿萬里而誰難疾魯荒之諛辭惡
京陵之譖言責當朝之憚貶對曩籍而興歎敦
怙寵而判違敵旣勅而國圯彼問鼎而何階必
先賊於君子原性分之異託雖殊塗而歸美或

卷舒以愚智。或治亂其如矢。謝昧迹而託規。卒
安身以全里。周顯節而犯逆。抱正情而喪已。薄
四望而尤眚。歎王路之中鯁。蠢百越之妖燼。敢
凌蹈於五嶺。崩雙嶽於中流。擬凶威於荆郢。隱
雷霆於帝坐。飛芒鏃於官省。于時朝有遷都之
議。人無守死之志。師旅痛於久勤。城墉闕於素
備。安危勢在不侔。衆寡形於見事。於赫淵謀。研
其神策。緩轡待機。追奔躡迹。遇雷池而振曜。次
彭蠡而殲滌。穆京甸以清晏。撤多壘而寔役。造

白石之祠壇，懟二豎之無君。踐掖庭以幽辱，凌
祧社而火焚。愍文康之罪已，嘉忠武之立勲。道
有屈於災蝕，功無謝於如仁。訊落星之饗旅，索
舊棲於吳餘。迹階阼而不見，橫榛莽以荒除。彼
生成之樂辰，亦猶今之在余。慨齊吟於爽鳩，悲
唐歌於山樞。弔僞孫於徐首，率君臣以奉疆。時
運師以伐罪，偏投書於武王。迄西北之落紐，乏
東南以振綱。誠鉅平之先覺，實中興之後祥。據
左史之攸徵，胡影迹之可量。過江乘而責始，知

遇雄之無謀厭紫微之宏凱甘陵波而遠遊越
雲夢而南沂臨沂河而東浮殼連弩於川上候
蛟龍於中流爰薄方與迺屆歐陽八夫江都之
域次乎廣陵之鄉易千里之曼曼沂江流之湯
湯洊赤圻以經復越二門而起漲眷北路以興
思看東山而怡目林叢薄路透迤石參差山盤
曲水激瀨而駿奔日映石而知旭審兼照之無
偏怨歸流之難濯羨輕紛之涵泳觀翔鷗之落
啄在飛沈其順從顧微躬而緬邈於是抑懷蕩

慮揚摧易難。利涉以吉。天險以艱。于敵伊阻。在國斯便。勾踐行霸於瑯邪。夫差爭長於黃川。葛相發歎而思正。曹后愧心於千寃。登高堞以詳覽。知吳淠之衰盛。戒東南之逆氣。成劉后之駢聖。藉鹽鐵之殷阜。臨淮楚之剽輕。盛几杖而弭心。怒抵局而遂爭。忿爰盎之扶禍。惜徒傷於家令。匪條侯之忠熟。將七國之陵正。褒漢藩之治民。並訪賢以招明。侯文辯其誰在。曰鄒陽與枚生。據忠辭於吳朝。執義說於梁庭。敷高才於兔

園雖正言而免刑闕里旣已千載深儒流於末
學欽仲舒之粹容遵縫掖於前躅對園囿而不
開下帷幙而論屬相端非之兩驕遭弘偃之雙
慝恨有道之無時步險塗以側足聞宣武之大
閱反師旅於此廬自皇運之都東始昌業以濟
難抗素旄於秦嶺揚朱旗於巴川懼帝系之墜
緒故黜昏而崇賢嘉收功以垂世嗟在嗣而覆
旃德非陟而繼宰覺踰禹其必顛造步兵而長
想欽太傅之遺武思嘉遁之餘風紹素履之落

緒民志應而願稅國屯難而思撫譬乘舟之待
楫象提釣之假縷總出入於和就兼仁用於默
語弘九流以繫四維復先陵而清舊宇却西州
之成功指東山之歸予惜圖南之啓運恨鵬翼
之未舉發津潭而迢邁逗白馬以憇艚貫射陽
而望邗溝濟通淮而薄甬城城陂阨兮淮驚波
平原遠兮路交過面芄野兮悲橋梓遡急流兮
苦磧沙曼千里而無山緬百谷而有居被宿莽
以逃徑覩生煙而知墟

缺六字

謂信美其可娛身

少長於樂土，實長歎於荒餘。

具瘁僨

歲寒之窮節，視曾雲之崔巍。聆悲飈之掩屑，彌
晝夜以滯淫。怨凝陰之方結，望新晴於落日起。
明光於躋月，眷轉蓬之辭根。悼朔鴈之赴越，披
微物而疚情。此思心其可說，問徃役其幾時。駭
閱景於興沒，感曰歸於采薇。予來思於雨雪，豈
初征之懼對。冀鸛鳴之在垤。

踰宿驚

吾楫於邳鄉，奚車正以事夏。虺左相以輔湯，綿
三代而享邑。厠踐土之一匡，嗟仲幾之寵侮。遂

捨存以徵亡、喜薛宰之善對、美士彌之能綱、升
曲垣之逶迤、訪淮陰之所都、原入跨之達耻、俟
遭時以遠圖、捨西楚以擇木、迫南漢以定謨、亂
孟津而魏滅、攀井徑而趙俱、播靈威於齊橫、振
餘猛於龍且、觀讓通而告狶、曷始智而終愚、迄
沂上而停柅、登高圯而不進、石幽期而知賢、張
禰景而示信、本文成之素心、要王子於雲仞、豈
無累於清霄、直有槩於貞吝、始熙績於武關、率
敷功於皇胤、處夷險以解挫、弘憂虞以時順、矜

若華之翳、晷哀飛驂之落、駿傷粒食而興念、眷
逸翮而思振、戾臣山而東顧、美相公之前代、嗟
殘虜之將糜、熾餘焱於海濟、驅鮐稚於淮曲、暴
鰥孤於泗滢、託未命

雲冀靈武之北閱、惟

授首之在晨、當盛暑而選徒、肅嚴威以振響、漸
溫澤而沾腴、旣雲撒於胸城、遂席卷於齊都、曩
四關其奚阻、道一變而是孚、傷炎季之崩弛、長
逆布以滔天、假父子以詐愛、借兄弟以僞恩、相
魏武以譎狂、充謨奮於東藩、桴未譟於東郭、身

已、馘、於、樓、門、審、貢、牧、於、前、說、證、所、作、於、舊、徐、聆、
泗、川、之、浮、磬、翫、夷、水、之、蠙、珠、草、漸、苞、於、埴、壤、桐、
孤、榦、於、嶧、隅、慨、禹、迹、於、尚、世、惠、遺、文、於、夏、書、紛、
征、邁、之、淹、留、彌、懷、古、於、舊、章、商、伯、文、於、故、服、咸、
徵、名、於、彭、殤、眺、靈、壁、之、曾、峰、投、呂、縣、之、迅、梁、想、
蹈、水、之、行、歌、雖、齊、汨、其、何、傷、啓、仲、尼、之、嘉、問、告、
性、命、以、依、方、豈、苟、然、於、迂、謫、聆、寓、言、於、達、莊、於、
是、濫、石、橋、登、戲、臺、策、馬、釣、渚、息、轡、城、隅、永、感、四、
山、零、淚、雙、渠、怨、物、華、之、推、驛、慨、舟、壑、之、遞、遷、謂、

徂歲之悠濶，結幽思之方根。感皇祖之徽德，爰
識冲而量淵，降俊明以鏡鑑。迴風猷以昭宣，道
旣底於國難，惠有覃於黎元。士頌歌於政教，民
謠詠於渥恩。兼采芑之致美，協漢廣之發言。強
虎氏之搏翼，灑雲網於所禁。驅黔萌以蘊崇，取
園陵而湮沈。錫殘落於河西，序淪胥於漢陰。攻
方城而折扃，擾譙潁其誰任。世闕才而貽亂，時
得賢而興治。救祖考之邦壤，在幽人而枉志。體
飛書之遠情，悟犒師之通識。迨明達之高覽，契

古今而同事拔淵謨於潛機騁神鋒於雲旆驅
斥澤而風靡蹙坑谷而鳥竄中華免夫左衽江
表此焉緩帶旣剋黜於肥六又作鎮於彭沛晏
皇塗於國內震天威於河外掃東齊而已寧指
西嶠而將泰值秉均而代謝實大業之興廢心
無忝於樂生事有像於燕惠抱明哲之不伐奉
宏勲而是稅捐七州以爰來歸五湖以投袂屈
盛績於平生申遠期於暮歲訪曩載於宋鄙採
陽秋於魯經晉申好於東吳鄭憑威於南荆故

反師於曹門。將以塞於夷庚。納五叛以長寇。伐
三邑以侵彭。美西鉏之忠辭。快韓厥之奇兵。追
項王之故臺。迹霸楚之遺端。挺宏志於總角。奮
英勢於弱冠。氣蓋天而倒日。力拔山而傾湍。始
颺起於勾越。中電激於衡關。興偏慮於攸吝。忘
卽易於所難。忌陳錦而莫照。思反鄉而有歎。且
夫殺義害嬰。而慢豐疑。縹賢不策。失位誰持。迨
理屈而愈閉。方怨天而懷悲。對駿騅以發憤。傷
虞姝於末詞。陟亞父之故營。諒謀始之非託。遭

衰羸之崩網。值威炎之結絡。迄皓首於阜陵。猶
謬覺於然諾。視一人於三傑。豈在已之庸弱。置
豐沛而不舉。故自同於狙獮。發卞口而游歷。迄
西山而弭轡。觀終古之幽憤。懷元王之冲粹。丁
戰國之權爭。方括心於道肆。學浮丘以就德。友
三儒以成類。潔流始於初源。累仁基於前美。撥
楚族之休烈。傳芳素於來祀。疆見譽於清虛。德
致稱於千里。或避寵以辭姻。或遺榮而不仕。政
直言以安身。駿絕才以喪已。驅信道之成終。表

昧世之虧始悟介焉之已差則不俟於終日既
防萌於未著雖念德其何益爾乃孟陬發節雷
隱蟄驚散葉萸柯芳藹飾萌麥萋萋於旄丘柳
依依於高城相睢鳩之集河觀鳴鹿之食苹沂
泗遠兮清川急秋冬近兮緒風襲風流蕙兮水
增瀾誦愁衿兮鑑戚顏愁盈根而蘊際戚發條
而成端嗟我行之彌日待征邁而言旋荷慶雲
之優渥周雙七於此季陶逸豫於京甸違險難
於行川轉歸弦而眷戀望修橋而流漣願關鄴

之遄清遲華鑿之訛旋穆淳風於六合溥洪澤
於八埏頒賢愚於大小順規矩於方圓固四民
之獲所宜稅稷於萊田苦邯鄲之難步庶行迷
之易痊長守朴以終稔亦拙者之政焉

歸塗賦

昔文章之士多作行旅賦或欣在觀國或怵在
斥徙或述職邦邑或羈役戎陳事由于外興不
自已雖高才可推求懷未愜今量分告退反身
草澤經塗履運用感其心賦曰

承百世之慶靈、遇千載之優渥、匪康衢之難踐、
諒跬步之易局、踐寒暑以推換、眷桑梓以緬邈、
褫簪帶于窮城、反巾褐于空谷、果歸期于願言、
獲素念于思樂、于是舟人告辦、伫楫在川、觀鳥
候風、望景測圓、背海向溪、乘潮傍山、悽悽送歸、
悠悠告旋、時旻秋之杪節、天旣高而物衰、雲上
騰而鴈翔、霜下淪而草腓、捨陰濛之舊浦、去陽
景之芳蕤、林乘風而飄落、水鑒月而含輝、發青
田之枉渚、逗白岸之空亭、路威夷而詭狀、山側

背而異形，停余舟而淹留，搜縉雲之遺迹，漾百里之清潭，見千仞之孤石，歷古今而長在，經盛衰而不易。

羅浮山賦

客夜夢見延陵茅山在京之東南，明旦得洞經所載羅浮山事，云茅山是洞庭口，南通羅浮，正與夢中意相會，遂感而作羅浮山賦，曰：

若廼茅公之說，神化是悉，數非億度，道單悒悒，洞四有九，此惟其七，潛夜隱輝，幽境朗日，故曰：

朱明之陽宮、耀真之陰室、洞穴之寶衢、海靈之
雲術、伊離情之易結、諒沉念之羅浮、發潛夢於
永夜、若遡波而乘桴、越扶嶼之細漲、上增龍之
合流、鼓蘭枻以水宿、杖桂策以山遊、

嶺表賦

若乃長山欵跨、外內乖隔、下無伏流、上無夷跡、
麕鹿望岡而旋歸、鴻鴈覩峰而返翮、旣陟麓而
踐坂、遂升降于山畔、顧後路之傾巘、睡前磴之
絕岸、看朝雲之抱岫、聽夕流之注澗、羅石碁布

怪譎橫越、非山非阜、如樓如闕、班采類繡、明白
若月、蘿蔓絕攀、苔衣流滑、

怨曉月賦

卧洞房兮當何悅、滅華燭兮弄曉月、昨三五兮
既滿、今二八兮將缺、浮雲蹇兮收泛灩、明舒照
兮殊皎潔、墀除兮鏡鑑、房櫳兮澄澈、

長谿賦

潭結綠而澄清、瀨揚白而載華、飛急聲之瑟汨、
散輕文之漣羅、始鏡底以如玉、終積岸而成沙、

江妃賦

招蒐定情、洛神清思、覃曩日之敷陳、盡古來之
妍媚、矧今日之逢迎、邁前世之靈異、姿非定容、
服無常度、兩宜歡嘯、俱適華素、于時升月隱山、
落日映嶼、收霞斂色、迴飈拂渚、每馳情于晨暮、
矧良遇之莫叙、投明璫以申贈、覲色授而蒐與、
沈分湘岸、延情蒼陰、隔山川之表裏、判天地之
浮沉、承嘉約于往昔、宜更貳于在今、儻借訪于
交甫、知斯言之可譏、蘭音未吐、紅顏若暉、留眄

光溢、動袂芳菲、散雲轡之絡繹、按靈輜而徘徊、
建羽旌而逶迤、奏清管之依微、慮一別之長絕、
眇天末而永違、

又江妃賦

小腰微骨、朱衣皓齒、綿視騰來、靡容臆理、嗟佳
人之眇邁、眺霄際而告語、懼展愛之未期、抑傾
念而慙伫、天台二娥、宮亭雙媛、青桂神接、紫衣
形見、或飄翰凌煙、或潛泳浮海、萬里俄頃、寸陰
未改、事雖假於雲物、心常得於無待、

入道至人賦

爰有名外之至人，乃八道而館真。荒聰明以削
智，遁支體以逃身。於是卜居千仞，左右窮懸。幽
庭虛絕，荒帳成煙。水縱橫以觸石，日參差於雲
中。飛英明於對溜，積氤氲而爲峰。推天地於一
物，橫四海於寸心。超埃塵以貞觀，何落落此胸
襟。

逸民賦

于天唯舍唯用，其見也則如游龍。其潛也

則如隱鳳來無所從去無所至有酒則舞無酒
則醒不明不晦不昧不貞蕭條秋首歲蕤春中
弄琴明月酌酒和風御清風以遠路拂白雲而
峻與指寰中以爲期望繫外而延佇

辭祿賦

荷賞延之渥恩在弱齡而覃惠蒙聖達之眷顧
得乘閒以沈泄雖鑣羈之有名恒遊獎而匪滯
解龜紐於城邑反褐衣於丘窟頻人事於一朝
與世物乎長絕自牽綴於朱絲奄二九於斯年

服纓佩於兩官執鞭笏於宰蕃

感時賦

夫逝物之感有生所同頽年致悲時懼其速豈
能忘懷廼作斯賦

相物類以迫已閔交臂之匪賒揆大耋之或邁
指崦嵫于西河鑒三命于予躬怛行年之蹉跎
于鷦鷯之先號挹芬芳而風過微靈芝之頻秀
迫朝露其如何雖發嘆之早晏諒大暮之同科

孝感賦

舉高檣于楊潭，眇投迹于炎州，貫廬江之長路，
出彭蠡而南浮，于時月孟節季，歲亦告暨，離鄉
眷壤，改時懷氣，戀上墳而縈心，憶桑梓而零淚，
孟積雪而抽筍，王斷冰以膾鮮，萸柔葉于枯木，
起春波于寒川，顧微心之庸褊，謝猜靈于昭晰，
擁永慕而莫從，曾遐感而靡徹，

傷已賦

嗟夫，卞賞珍于連城，孫別駿於千里，彼珍駿以
貽愛，此陋容其敢擬，丁曠代之渥惠，遭謬眷下

君子眇徂歲之驟經覩芳春之每始始春芳而
羨物終歲徂而感已貌憔悴以衰形意幽鬱而
苦心出衾裯而載坐闔檐幌以迴臨望步檐而
周流眺幽閨之清陰想輕綦之往跡餐和聲之
餘音播芬煙而不燠張明鏡而不照歌白華之
絕曲奏蒲生之促調

月算

卷一

三

表

勸伐河北表

自中原喪亂百有餘年流離寇戎湮沒殊類先
帝聰明神武哀濟羣生將欲盪定趙魏大同文
軌使久凋反於正化偏俗歸於華風運謝事乖
理違願絕仰德抱悲恨存生盡況陵塋未幾凶
虜伺隙預在有識誰不憤歎而景平執事並非
其才且邁紛京師豈慮託付遂使孤城窮陷莫
肯極忠烈囚朔漠繇河三千翻爲寇有晚遣鎮

戍皆先朝之所開拓。一旦淪亡。此國耻宜雪。被
於近事者也。又北境自染逆虜。窮苦備罹。徵調
賦歛。靡有止已。所求不獲。輒致誅殞。身禍家破。
闔門比屋。此亦仁者所爲傷心者也。咸云西虜
舍未遠。師隴外。東虜乘虛。呼可掩襲。西軍旣反。
得據關中。長圍咸陽。還路已絕。雖遣救援。停住
河東。遂乃遠討大城。欲爲首尾。而西寇深山重
阻。根本自固。徒棄巢窟。未足相搔。師老於外。國
虛於內。時來之會。莫復過此。觀兵耀威。實在茲

日若相持未已。或生事變。忽值新起之衆。則異於今。苟乖其時。難爲經略。雖兵食倍多。則萬全無必矣。又歷觀前代。類以兼弱爲本。古今聖德未之或殊。豈不以天時人事。理數相得。興亡之度。定期居然。故古人云。旣見天殃。又見人災。乃可以謀。昔魏氏之強。平定荆冀。乃乘袁劉之弱。晉世之盛。拓開吳蜀。亦因葛陸之衰。此皆前世成事。著於史策者也。自羗平之後。天下亦謂虜當俱滅。長驅滑臺。席卷下城。奪氣喪魄。指日就

盡。但長安違律。潼關失守。用緩天誅。假延歲月。
日來至今。十有二載。是謂一紀。曩有前言。况五
胡代數。齊世。虜期餘命。盡於來年。自相攻伐。兩
取其困。下莊之形。驗之今役。仰望聖澤。有若飢
渴。注心南雲。爲日已久。來蘇之冀。實歸聖明。此
而弗乘。後則未兆。卽日府藏。誠無兼儲。然凡造
大事。待富國兵強。不必乘會。於我爲易。責在得
時。器械旣克。衆力粗足。方於前後。乃當有優。常
議損益。久證冀州口數百萬有餘。田賦之沃。著

自貢典。先才經創。基趾猶存。澄流引源。桑麻蔽
野。強富之實。昭然可知。爲國長久之計。孰若一
往之費邪。或懲關西之敗。而謂河北難守。二境
形勢。表裏不同。關西雜居。種類不一。昔在前漢。
屯軍霸上。通火甘泉。況乃遠戍之軍。值新故交。
代之際者乎。河北悉是舊戶。差無雜人。連嶺判
阻。三關作隘。若遊騎長驅。則沙漠風靡。若嚴兵
守塞。則冀方山固。昔隴西傷破。鼂錯興言。匈奴
慢侮。賈誼憤歎。方於今日。皆爲賒矣。昔晉武中。

主耳。值孫皓虐亂。天祚其德。亦由鉅平奉策。荀
賈折謀。故能業崇當年。區宇一統。況今陛下聰
明聖哲。天下歸仁。文德與武功並震。霜威共素
風俱舉。協以宰輔賢明。諸王羨令。岳牧宣烈。虎
臣盈朝。而天或遠命。亦同敵不滅。矧伊頑虜。假
日而已哉。伏惟深機志務。久定神謨。臣卑賤側
陋。竄景巖穴。實仰希太平之道。傾覩岱宗之封。
雖乏相如之筆。庶免史談之憤。以此謝病京師。
萬無恨矣。久欲上陳。懼在觸置。蒙賜恩假。暫違

禁省消渴十年常慮朝露抱此愚志昧死以聞
謝封康樂侯表

昔強氏暴虐恃僭厯紀既噬五都志吞六合遂
陷沒西河傾覆南漢凌藉紀郢跨越淮泗于時
策畫惟疑地險已謝咸懇君臣同泯有生無餘
亡祖奉國威靈董符戎重盡心所事尅黜禍亂
功參盤鼎胙土南服逮至臣身值遭泰路日月
改暉榮落代運輸稅唐化生幸無已不悟天道
下濟鴻均曲成廼眷遐績式是興徵分虎紐龜

復顯茅土、鳴玉、拖綬、班景、元勛、澤洽、往德、恩覃、
來、膺、永、惟、先、蹤、遠、感、崩、結、豈、臣、阉、弱、所、當、忝、承、
臣聞至公無私。甄善則一。皇恩遠被。殘代可侔。
是以信陵之賢。簡在高祖之心。望諸之道。復獲
隆漢之封。觀史歎古。欽茲盛美。豈謂榮渥。近霑
微躬。傾宗殞元。心識其會。酬恩答厚。罔知所由。
詣闕上表

臣自抱疾歸山。于今三載。居非郊郭。事乖人間。
幽棲窮巖。外緣兩絕。守分養命。庶畢餘年。忽以

去月二十八日、得會稽大守臣顓二十七日疏、
云、比日異論噂、此雖相了、百姓不許寂默、今
微爲其防、披疏駭惋、不解所由、便星言奔馳、歸
骨陞下、及經山陰、防衛彰赫、彭排馬槍、斷截衢
巷、偵邏縱橫、戈甲竟道、不知微臣罪爲何事、及
見覬、雖曰見亮而裝防如此、唯有罔懼、臣昔忝
近侍、豫蒙天恩、若其罪迹、炳明文字、有證非但、
顯戮、司敗以正國典、普天之下、自無容身之地、
今虛聲爲罪、何酷如之、夫自古讒謗、聖賢不免、

然致謗之來。要有由趣。或輕死重氣。結黨聚羣。或勇冠鄉邦。劍客馳逐。未聞俎豆之學。欲爲逆節之罪。山棲之士。而構陵上之釁。今影迹無端。假謗空設。終古之酷。未之或有。匪忝其生。實悲其痛。誠復內省不疚。而抱理莫申。是以牽曳疾病。束骸歸歟。仰憑陛下天鑒曲臨。則死之日。猶生之年也。臣憂怖彌日。羸疾發動。尸存恍惚。不知所陳。

牋

與廬陵王牋

會境旣豐山水。是以江左嘉遁。並多居之。但季
世慕榮。幽棲者寡。或復才爲時求。弗獲從志。至
若王弘之拂衣歸耕。踰歷三紀。孔淳之隱約窮
岫。自始迄今。阮萬齡辭事就閒。纂成先業。浙河
之外。棲遲山澤。如斯而已。旣遠同義。唐亦激貪
厲競。殿下愛素好古。常若布衣。每意昔聞。虛想
巖穴。若遣一介。有以相存。真可謂千載盛美也。

謫居集

卷一

聖

謫居集卷一
余嘗以謫居為苦而不知謫居之樂也
昔蘇軾謫居黃州時作謫居集
其言謫居之樂曰謫居之樂
在於無事無事則心閒
心閒則身安身安則樂
矣余嘗以謫居為苦而不知謫居之樂也
昔蘇軾謫居黃州時作謫居集
其言謫居之樂曰謫居之樂
在於無事無事則心閒
心閒則身安身安則樂
矣

謫居集

書

答范光祿書

辱告慰企晚寒體中勝常靈運脚諸疾比春更甚憂慮故人有情信如來告企詠之結實成饑渴山澗幽阻音塵濶絕忽見諸讚歎慰良多可謂俗外之詠尋覽三復味翫增懷輒奉和如別雖辭不足覩然意寄盡此從弟惠連後進文悟衰宗之美亦有一首并以遠呈

又

承祇洹法業日茂。隨喜何極。六梁徽緣。竊望不絕。卽時經始招提。在所住山南。南檐臨澗北戶。背巖以此息心。當無所忝邪。平生緬然。臨紙累歎。敬惜爲先。繼以音告。儻值行李。輒復承問。

答王衛軍問辨宗論書

靈運白。一悟理質。以經誥可謂俗文之談。然書不盡意。亦前世格言。幽僻無事。聊與同行道人。共求其衷。猥辱高難。詞徵理析。莫不精究。尋覽彌日。欣若暫對。輒復更伸前論。雖不辨酌釋來。

問。且以示懷耳。海嶠咀迴。披示無期。臨白增懷。
眷歎良深。

與弟書

聞惡溪道中九十九里有五十九灘。王右軍游
此惡道。歎其奇絕。遂書突星瀨於石。

答弟書

前月十二日至永嘉郡。蠓不如鄞縣。車螯亦不
如北海。

答綱琳二法師書

披覽雙難欣若暫對藻豐論博蔚然滿目可謂
勝人之口然未厭於心聊伸前意無由言對執
筆長懷一日至永嘉縣

晉書

其意與康樂其音聲發書其意與康樂

開懸樂直中其十其里市正其武備王其軍

與康書

晉書

其且以示其耳其意與康樂其意與康樂其意與康樂

志

遊名山志

夫衣食人生之所資。山水性分之所適。今滯所
資之累。擁其所適之性耳。俗議多云。歡足本在
華堂。枕嵒漱流者。乏於大志。故保其枯槁。余謂
不然。君子有愛物之情。有救物之能。橫流之弊。
非才不治。故時有屈已以濟彼。豈以名利之場。
賢於清曠之域耶。語萬乘則鼎湖有縱轡。論儲
貳則嵩山有絕控。又陶朱高揖越相。留侯願辭

漢傳推此而言可以明矣。

破石溪南二百餘里。又有石帆。修廣與破石等。度質色亦同。傳云古有人以破石之半爲石帆。故名彼爲石帆。此名破石。

永嘉安固二縣中路東南便是赤石。又枕海巫湖三面悉高山。枕水渚山溪澗。凡有五處。南第一谷。今在所謂石壁精舍。

石門澗六處。石門遡水上入兩山口。兩邊石壁右邊石巖下臨澗水。

神子溪南山與七里山分流去斤竹澗數里。

華子岡麻山第三谷。故老相傳華子期者祿里先生弟子。翔集此頂。故華子爲稱也。

桂林頂遠。則嵯尖疆中。

從臨江樓步路南上二里餘。左望湖中。右傍長江。

始宜又北轉一汀十里。直指舍下。園南門樓自南樓百步許。對橫山。

論

辨宗論 問答附

同遊諸道人。並業心神道。求解言外。余枕疾務寡。頗多暇日。聊申繇來之意。庶定求宗之悟。釋氏之論。聖道雖遠。積學能至。累盡鑒生。不應漸悟。孔氏之論。聖道既妙。雖顏殆庶。體無鑒周。理歸一極。有新論道士。以爲寂鑒微妙。不容階級。積學無限。何爲自絕。今去釋氏之漸悟。而取其能至。去孔氏之殆庶。而取其一極。一極異漸悟。

能至非殆廢。故理之所去。雖合各取。然其離孔
釋矣。余謂二談救物之言。道家之唱得意之說。
敢以折中自許。竊謂新論爲然。聊答下意。遲有
所悟。

法勗問敬覽清論。明宗極雖微。而一悟頓了。
雖欣新剖。竊有所疑。夫明達者以體理絕欲。
悠悠者以迷惑嬰累。絕欲本乎見理。嬰累繇
於乖宗。何以言之。經云。新學者離般若。便如
失明者無導。是爲懷理蕩患於茲顯矣。若涉

求未漸於大宗希仰猶累於塵垢則永劫劬勞期果絢邈既懷猶豫伏遲嘉訓

初答道與俗反理不相關故因權以通之權雖是假旨在非假智雖是真能爲非真非真不傷真本在於濟物非假不遂假濟物則反本如此之劫無空勤期果有如皎日

勗再問案論孔釋其道既同救物之假亦不容異而神道之域雖顏也孔子所不誨實相之妙雖愚也釋氏所必教然則二聖建言何

乖背之甚哉

再荅二教不同者。隨方應物。所化地異也。大而
校之。華民易於見理。難於受教。故閉其累學而
開其一極。夷人易於受教。難於見理。故閉其頓
了。而開其漸悟。漸悟雖可至。昧頓了之實。一極
雖知寄。絕累學之冀。良由華人悟理無漸。而誣
道無學。夷人悟理有學。而誣道有漸。是故權實
雖同。其用各異。昔向子期以儒道爲壹應。吉甫
謂孔老可齊。皆欲窺宗。而况真實者乎。

易三問重尋。答以華夷有險易之性。故二聖
敷異同之教。重方附俗。可謂美矣。然淵極朗
鑒。作則於上。愚民蒙昧。伏從於下。故作則宜
審其政。伏從必是其宗。今孔廢聖學之路。而
釋開漸悟之逕。筌蹄既已紛錯。羣黎何由歸
真。

三。蒼冬夏異性。資春秋爲始末。晝夜殊用。緣辰
暮以往復。况至精之理。豈可逕接。至粗之人。是
故傷漸悟者。所以密造頓解。倚孔教者。所以潛

成學聖。學聖不出六經。六經而得頓解。不見三藏。而以三藏果。筌蹄歷然。何疑紛錯。魚兔既獲。羣黎以濟。

僧維問承新論。法師以宗極微妙。不容階級。使夫學者窮有之極。自然之無。有若無契。何須言無也。若資無以盡有者。焉得不謂之漸悟耶。

初荅夫累既未盡。無不可得。盡累之弊。始可得無耳。累盡則無誠如符契。將除其累。要須傍教。

在有之時學而非悟。悟在有表託學以至但階級教愚之談。一悟得意之論矣。

維再問論云。悟在有表。得不以漸。使夫涉學希宗。當日進其明。不若使明不日進。與不言同。若日進其明者。得非漸悟乎。

再荅夫明非漸至。信由教發。何以言之。由教而信。則有日進之功。非漸所明。則無入照之分。然向道善心起。損累出垢伏。伏似無同。善似惡乖。此所務不俱非。心本無累。至夫一悟。萬滯同盡。

耳。

維三問。荅云。由教而信。則有日進之功。非漸所明。則無入照之分。夫尊教而推宗者。雖不永用。當推之時。豈可不慙。令無耶。若許其慙合。猶自賢於不合。非漸如何。

三荅慙者。假也。真者。常也。假知無常。常知無假。今豈可以假知之慙。而侵常知之真哉。今慙合。賢於不合。誠如來言。竊有微證。巫臣諫莊王之言。物賒於已。故理爲情先。及納夏姬之時。已交。

於物故情居理上。情理雲互。物已相傾。亦中智之率任也。若以諫曰爲悟。豈容納時之惑耶。且南爲聖也。北爲愚也。背北向南。非停北之謂。向南背北。非至南之稱。然向南可以至南。背北非是停北。非是停北。故愚可去矣。可以至南。故悟可得矣。

慧麟演僧維問。當假知之。壹含與真知同異。初荅與真知異。麟再問。以何爲異。

再荅假知者累伏。故理暫爲用。用暫在理。不恒其知。真知者照寂。故理常爲用。用常在理。故永爲真知。

麟三問累不自除。故求理以除累。今假知之。一合理實在心。在心而累不去。將何以去之乎。

三荅累起因心。心觸成累。累恒觸者。心日昏。教爲用者。心目伏。伏累彌久。至於滅累。然滅之時。在累伏之後也。伏累滅累。貌同實異。不可不察。

滅累之體。物我同忘。有無壹觀。伏累之狀。他已異情。空實殊見。殊實空異已。他者入於滯矣。壹無有。同我物者。出於照也。

麟維問三世長於百年。三千廣於赤縣。四部多於戶口。七寶妙於石沙。此亦方有小大。故化有遠近。得不謂之然乎。

初荅事理不同。恒成四端。自有小大。各得其宜。亦有賢愚。違方而處。所謂世同時異。物是人非。譬割雞之政。亦有牛刀。佩璽而聽。豈皆唐虞。今

謂言游體盡於武城。長世皆覃於天下。未之聞也。且俱稱妙覺。而國土精粗。不可以精粗國土。而言聖有優劣。景迹之應。本非所徵矣。

維再問論曰。或道廣而事狹。或事是而人非。今不可以事之大小。而格道之粗妙。誠哉斯言。但所疑不在此耳。設令周孔實未盡極。以之應世。故自居宗。此自是世去聖遠。未足明極。夫降妙數階。以接羣粗。則粗者所不測。然數階之妙。非極妙之謂。推此而言。撫世者於

粗爲妙。然於妙猶粗矣。以妙求粗。則無往不盡。以粗求妙。則莫覩其源。無往不盡。故謂之窮理。莫覩其源。故仰之彌高。今豈可就顏氏所崇而同之極妙耶。

再荅今不藉顏所推而謂之爲極。但謂顏爲庶幾。則孔知幾矣。且許禹昌言。孔非本談。以堯則天。體無是同。同體至極。豈計有之小大耶。

維三問。凡世人所不測。而又昌言者。皆可以爲聖耶。

三荅夫昌言賢者尚許其賢昌言聖者豈得反
非聖耶日用不知百姓之迷蒙唯佛究盡實相
之崇高今欲以崇高之相而令迷蒙所知未之
有也苟所不知焉得不以昌言爲信旣以釋昌
爲是何以孔昌爲非耶

法綱問云敬披高論探研宗極妙判權實存
旨儒道遺教孔釋昌言折中允然新論可謂
激流導源瑩拂發揮矣詳復荅勗維之問或
謂因權以通或學而非悟爾爲立句徒設無

關於胸情焉。竊所未安。何以言之。夫道形天。
隔幾二險絕。學不漸宗。曾無髣髴。馳騁有端。
思不出位。神崖曷由而登。機峯何從而超哉。
若勤務於有。而坐體於無者。譬猶揮毫鍾張。
之則。功侔羿養之能。不然明矣。蓋同有非甚。
礙。尚不可以翫此而善彼。豈況乎有無之至。
背。而反得以相通者耶。又云累既未盡。無不。
可得。盡累之弊。始可得無耳。論曰。夫膏肓大。
道。摧輶立路。莫尚於封有之累也。蓋有不能。

祛有祛有者必無。未有先盡有累。然後得無也。就如所言累盡則無爾。爲累之自去。實不無待。實不無待。則不能不無。故無無貴矣。如彼重闇自晞。無假火日。無假火日。則不能不設。亦明無尚焉。落等級而奇頓悟。將於是乎躋矣。暇任之餘。幸思嘉釋。

來難云。同有非甚礙。尚不可以翫此。而善彼。豈況乎有無之至背。而反得以相通者耶。此是拘於所習。以生此疑耳。夫專翫筆札者。自可不工。

於弧矢。弧矢旣工。復翫筆札者。何爲不兼哉。若
封有而不向宗。自是封者之失。造無而去滯。何
爲不可得背。借不兼之有。以詰能兼之無。非惟
鍾胡愧射於更李。羿養慙書於羅趙。觸類之蹟。
始克巧。厯之歎。今請循其本。夫憑無以伏。有伏
久則有忘。伏時不能知。知則不復辨。是以坐忘
日損之談。近出老莊。數緣而滅。經有舊說。如此
豈累之自去。實無之所濟。且明爲晦新。功在火
日。但火日不稱功於幽闇。般若不言惠於愚蠢。

耳。推此而往。詎俟多云。

慧琳問云。三復精議。辨愷二家。斟酌儒道。實有懷於論矣。至於去釋漸悟。遺孔殆庶。蒙竊惑焉。釋云有漸。故是自形者有漸。孔之無漸。亦是自道者無漸。何以知其然耶。中人可以語上。久習可以移性。孔氏之訓也。一合於道場。非十地之所階。釋家之唱也。如此漸絕文論。二聖詳言。豈獨夷束於教。華拘於理。將恐斥離之辨。辭長於新論乎。勗道人難云絕欲。

由於體理當謂日損者以理自悟也論曰道
與俗反本不相關故因權以通之物濟則反
本問曰權之所假習心者亦終以爲慮乎爲
曉悟之日與經之空理都自反耶若其永背
空談翻爲未說若始終相扶可循教而至不
荅維麟假知中殊爲藻艷但與立論有違假
者以旋迷喪理不以鑽火致惑苟南向可以
造越背北可以棄燕信燕北越南矣慮空可
以洗心捐有可以祛累亦有愚而空聖矣如

此但當勤般若以日忘。瞻郢路而驟進。復何
憂於失所乎。將恐一悟之唱。更躋於南北之
譬耶。

孔雖曰語上。而云聖無階級。釋雖曰一合。而云
物有佛性。物有佛性。其道有歸。所疑者漸教。聖
無階級。其理可貴。所疑者殆庶。豈二聖異塗。將
地使之然。斥離之歎。始是有在。辭長之論。無乃
角弓耶。難云若其永背空談。翻與未說。若始終
相扶。可循教而至。可謂公孫之辭。辨者之囿矣。

夫智爲權本。權爲智用。今取聖之意則智。卽經之辭則權。傍權以爲檢。故三乘咸蹄筌。旣意以歸宗。故般若爲魚兔。良由民多愚也。故教迂矣。若人皆得意。亦何貴於攝悟假知之論旨。明在有者能爲達理之諫。是爲交賒相傾。非悟道之謂。與其立論有何相違。燕北越南。有愚空聖。其理旣當。頗獲於心矣。若勤者日忘。瞻者驟進。亦實如來言。但勤未是得。瞻未是至。當其此時。可謂向宗。旣得旣至。可謂一悟。將無同轡來馳而。

云異轍耶

論曰繇教而信有日進之功非漸所明無入
照之分問曰繇教而信而無入照之分則是
闇信聖人若闇信聖人理不關心政可無非
聖之尤何繇有日進之功

以下王衛
軍問答

荅曰顏子體二未及於照則向善已上莫非闇
信但教有可由之理我有求理之志故曰關心
賜以之二回以之十豈直免尤而已實有日進
之功

論曰暫者假也、真者常也、假知無常常知無假、又曰假知累伏、理暫爲用、用暫在理、不恒其知、問曰暫知爲假、知者則非不知矣、但見理尚淺、未能常用耳、雖不得與真知等照、然宜無入照之分耶、若暫知未是見理、豈得云理暫爲用、又不知以何稱知、

荅曰不知而稱知者、正以假知得名耳、假者爲名、非暫知如何不恒其用、豈常之謂、旣非常用、所以交賒相傾、故諫人則言政理、悅已則犯所

知。若以諫時爲照。豈有悅時之犯。故知言理者。浮談。犯知者沈惑。推此而判。自聖已下。無淺深之照。然中人之性。有崇替之心矣。

論曰。教爲用者。心日伏。伏累彌久。至於滅累。問曰。教爲用而累伏。爲云何伏耶。若都未見理。專心闇信。當其專心。惟信而已。謂此爲累伏者。此是慮不能竝。爲此則彼廢耳。非爲理累相權。能使累伏也。凡厥心數。孰不皆然。如此之伏。根本未異。一倚一伏。循環無已。雖復

彌久累何由滅。

荅曰累伏者屬此則廢彼實如來告凡厥心數孰不皆然亦如來旨更恨不就學人設言而以恒物爲譏耳譬如藥驗者疾易痊理妙者吝可洗洗吝豈復循環疾痊安能起滅則事不侔居然已辨但無漏之功故資世俗之善善心雖在五品之數能出三界之外矣平叔所謂冬日之陰輔嗣亦云遠不必攜聊借此語以況入無果無阻隔。

西園記

習斷斷衣云直下如機深背出器於眾人無異
止品之漫指出三果之代定平又衣器今日之
然且無財無謂之衣姑究世道之善惡必能
我我者豈對爵與矣空矣業多功明事不事
目時為端耳輕賦無嫌清為最至聖德情寄
雖不背然亦破來者更題不號學入對言而
苦曰果為善觀此師焉安實中來告子烈公刻
陳公果何由然

頌

無量壽佛頌

法藏長王宮、懷道出國城、願言四十八弘誓、拯
羣生、淨土一何妙、來者皆清英、願年欲安寄、乘
化好晨征、

三

三

三

三

贊

王子晉讚

淑質、非不麗、難以之、百年、儲宮、非不貴、豈若登、
雲天、王子愛清淨、區中寔囂誼、冀見浮丘公、與
爾共續翻、

巖下見一老翁四五少年讚

盛弘之荊州記初有採藥衡山、
見一老翁四五少年對坐執書、

衡山採藥人、路逃糧亦絕、過息巖下坐、正見相
對說、一老四五少仙、隱不可別、其書非世教、其

人必賢哲

維摩經十譬贊

聚沫泡合

水性本無泡。激流遂聚沫。卽異成貌狀。消散歸
虛壑。君子識根本。安事勞與奪。愚俗駭變化。橫
復生欣怛。

燄

性內相表狀。非炎安知火。新新相推移。熒熒非
向我。如何滯着人。終歲逃因果。

芭蕉

生分本多端。芭蕉知不一。含萼不結核。敷華何由實。至人善取譬。無宰誰能律。莫昵緣合時。當視分散日。

聚幻

幻工作同異。誰謂復非真。一從逝物過。既往亦何陳。謬者疑久近。遠者皆自賓。勿起離合情。會無百代人。

夢

覺謂寢無知。寐中非無見。意狀盈眼前。好惡迭

一作迷

萬變。既悟眇已往。惜爲浮物戀。孰視婆娑

盡。宜當非赤縣。

影響合

影響順形聲。資物故生理。一旦揮霍去。何因相
像似。羣有靡不然。昧漠呼自已。四色尚無本。八
微欲安恃。

浮雲

泛濫明月陰。蒼蔚南山雨。能爲變動用。在我竟

無取。俄已就飛散。豈復得攢聚。諸法旣無我。何由有所。

電

倏、燦、驚、電、過、可、見、不、可、逐、恒、物、生、滅、後、誰、復、覈、
遲、速、慎、勿、空、留、念、橫、使、神、理、惡、發、已、道、易、孚、忘、
情、長、之、福。

侍汎舟贊

汎、鷁、今、遊、蘭、池、渚、相、委、今、不、參、差、日、隱、雲、今、月、
照、林、風、遼、冷、今、水、漣、漪、

和范光祿祗洎像讚三首

范侯遠送像讚命余同作神道希微願言所屬輒總三首期之道場

佛讚

惟此大覺因心則靈垢盡智照數極慧明三達非我一援羣生理阻心行道絕形聲

菩薩讚

若人仰宗發性遺慮以定養慧和理斯附爰初四等終然十住涉求至矣在外皆去

緣覺聲聞合讚

厭苦情多。兼物志少。如彼化城。權可得寶。誘以
涅槃。救爾生老。肇元三車。翻乘一道。

謝康樂集

卷一

二十七

出梁武帝書云三東樂一類

謝康樂集卷一

謝康樂集卷一

銘

佛影銘

夫大慈弘物，因感而接。接物之緣，端緒不一。難以形檢，易以理測。故已備載經傳，具著記論矣。雖舟壑緬謝，像法猶在。感運欽風，日月彌深。法顯道人，至自祇洹，具說佛影，偏爲靈奇。幽巖嵌壁，若有存形。容儀端莊，相好具足。莫知始終，常自湛然。廬山法師，聞風而悅。於是隨喜幽室，卽考空巖，北枕峻嶺，南映滌澗。摹擬遺量，寄託青

彩豈唯像形也篤故亦傳心者極矣道秉道人
遠宣意旨命余製銘以克刊刻石銘所始寔由
功被未有道宗崇大若此之比豈淺思庸學所
能宜述事經徂謝永眷罔已輒罄竭劣薄以諾
心許微猷秘奧萬不寫一庶推誠心頗感群物
飛鶚有革音之期闡提獲自拔之路當相尋於
淨土解顏於道場聖不我欺致果必報援筆興
言情追其慨

群生因染六趣牽纏七識迭用九居屢遷劇哉

五陰卷矣。四緣遍使轉輪。苦根迤邐。迤邐未已。
轉輪在已。四緣雲藻。五陰火起。疊疊正覺。是極
是理。動不傷寂。行不乖止。曉爾長夢。貞爾沈訖。
以我神明。成爾靈智。我無自我。實承其義。爾無
自爾。必祛其僞。僞既殊塗。義故多端。因聲成韻。
卽色開顏。望影知易。尋響非難。形聲之外。復有
可觀。觀遠表相。就近暖景。匪質匪空。莫測莫領。
倚巖輝林。傍潭鑒井。借空傳翠。激光發同。金好
冥漠。白豪幽暖。日月居諸。胡衹斯慨。曾是望僧。

擁誠侯對承風遺則曠若有槩敬圖遺縱疏鑿
峻峰周流步欄窈窕房櫳激波映墀引月入窓
雲往拂山風來過松地勢旣美像形亦篤彩淡
浮色群視沈覺若滅若無在摹在學由其潔精
能感靈獨誠之云乎惠亦孔續嗟爾懷道慎勿
中惕弱喪之推闡提之役反路今覩發蒙茲覲
式厲厥心時逝流易敢銘靈宇敬告震錫

書帙銘

懷幽卷顧戢妙抱密用舍以造舒卷不失亮惟

勤玩無或暇逸。

讀書集

七

七濟

朝食既畢摘菓堂陰春惟枇杷夏則林檎

謝康樂集

謝康樂集

七

謝康樂集

謝康樂集

謝康樂集

謝康樂集

誄

宋武帝誄

九有同悲。四海等哀。矧伊下臣。思戀徘徊。敢遵前典。式述聖微。乃作誄曰。

舜潛厯巖。高晦泗渚。龍德而隱。風積乃舉。皇之遁世。屯難方阻。眷此區寰。閔爾淪胥。太元之季。權戚攜薄。隆安之初。主相蒙弱。獄牧糾虔。朝廷紛錯。妖橫乘隙。蛟噴鯨躍。旣擾奧區。遂斥帝座。亂離斯瘼。不後不先。寔賴明哲。授手康旃。紀度

迴薄餘分成閨。舊晉中微。僞楚藉釁。躡彼潛機。
整此英陣。推亡必朽。固存斯振。盧循負險。肆慝
遐嶺。殄我江豫。迫我臺省。民旣搖蕩。國將遷鼎。
乘騶歸轅。式固皇境。弘危濟險。弭難釋殆。虎騎
驚隰。舟師漲海。傾穴尋巢。窮幽測昧。昔去洛汭。
息肩江沚。世更十君。年踰百祀。國絕興復。家成
桑梓。荒默莫恤。頽國誰耻。夏典載禹。九道是行。
商誥述湯。兼攻是弁。勤彼周流。協此經營。仗鉞
伐鼓。赫赫明明。乃敕衆師。竟執戎昭。誨以三略。

惠以六韜，雲撤周京。席卷秦郊，復禮前坐。雪愧
舊朝，旣清西關。將旋東道，中憇徐豫。兼應燕趙，
業盛曩代。惠侔大造，澤及四海。功格八表，悠悠
聲教。縣縣川陸，北獻氊裘。南貢金竹，髻首冠弁。
穿胸歛服，寒允欣日。巢棲玩屋，匪惟遐譚。靈物
偕就，孰是人事。自天所佑，甘露芝草。祥雲瑞宿，
嘉禾連木。素鳥皓獸，昔之所感。謳頌同音，今之
所應。幽顯一心，宋克虞德。晉猶唐欽，曰總八絃。
于茲三齡，四維開張。九流昭明，敦儉務素。欽賢

愛萌制規作訓闡校修經禮樂已甄雲雨未弘
將陟井陘薄掃白登北朔渴望飛旌衡輶東岱
靈遲玉牒金滕天地不仁蒼生寡福已荷一遇
棄我何速梁顛木殞甘殞以贖同軌畢至率土
咸哀殊方均服樂樂素縗灑淚成雨響叫如雷
史臣考卜高山開基貞龜無遠遷靈有期嗣皇
擗標群后崩悲就云不戚痛百在茲惟祖之久
流火始變秋月未永飛漏急箭鳴簫哀噉金觴
虛奠列駕長隧發輦華歟華殿旣謝長隧是幸

雙葢躊躇六閑引領攀援容貌眷戀俄頃哀哀
百僚長辭含鰓奉教百朝執鞭三始從履五牧
年厯十祀天光下濟謬蒙眷齒愧微刀筆頗預
遊止垂幕待講接筵餐理修曙朗久登臺泛沼
匪月匪日無晏無早如何一旦緬邈穹昊微容
未遠聖靈超然收淚卽路含戚何言風霜蕭瑟
山海蒼茫地苦情矜節速心傷孰是幽哀實戀
我皇情思如環護蘇豈忘

宋廬陵王誄

事○非○淮○南○而○痛○深○於○中○霧○迹○非○任○城○而○暴○甚○於○
仰○毒○託○體○皇○極○銜○怨○至○盡○豈○惟○有○識○傷○慨○故○亦○
率○土○懷○心○蓋○出○罔○已○之○悲○以○陳○酸○切○之○事○云○爾○
詠曰

哀哀君王，終仁且德，在枉無言，卽臯有默。曾是
忍虐，古來一酷，身微咎累，痛踰酖毒。何斯禍斯，
乃怨乃辱，命如可延，人百其贖。矜急景之難留，
悼驚波之易淪。自君王之冥漠，歷彌稔於此春。
聆鳴禽之響谷，視喬木之陵雲。咸感節而興悅，

獨懷悲而莫申。候射隼于高墉。赫王典以正刑。
服二辜于北狴。致九伐于南荆。發酸痛于仁詔。
令寵贈于哀心。布悽楚于帝言。攄綢繆于皇音。

曇隆法師誄

夫協理置論。百家未見其是。因心自了一已。不
患其躋。而終莫相辨。我若咸歎。翻淪得拔。竟知
于誰。冀行跡立。則善惡靡徵。欲聲名傳。則薰蕕
同歇。然意非身之所挫。期出命之所限者。目所
親覲。見之若人矣。慧心朗識。發于髫髻。生自豪

華家贏金帛。加以巧乘騎。解絲竹。秣絕景于康衢。弄絃管於華肆者。非徒經旬涉朔。彌历年稔而已。諒趙李之咸陽。程鄭之臨邛矣。旣而永夜獨悟。中飲興歎。曰。悲夫。欣厭迭來。終歸憂苦。不杜其根。於何超絕。且三界迴沈。諸天倏瞬。况齊景牛山。趙武企陰。催促節物。逼迫霜露。推此願言。伊何能久。慨然有擯落榮華。兼濟物我之志。毋氏矜其心。姊弟申其操。遂相許諾。出家求道。一身旣然。闔門離世。妻子長絕。歡娛永謝。豈唯

向之靡樂判之盛年。終古恩愛於今化別矣。旅
舟南遡投景廬嶽。一登石門香鑪峰。六年不下
嶺。僧衆不堪其操。法師不改其節。援物之念不
以幽居自抗。同學嬰疾振錫萬里相救。余時謝
病東山承風遙羨。豈望人期。頗以山招。法師至
止。鄙人榮役前詩。敘粗已記之。故不重煩。及中
間反山成說。款盡遂獲。接棟重崖。俱浥迴澗。茹
芝朮而共餌。披法言而同卷者。再歷寒暑。非直
山陽靡喜。慍之容令尹一進已之色。實明悟幽

微祛滌近滯、蕩客澡垢、日忘其疾、庶白首同居
而乖離無象、信順莫歸、徵集何緣、晚節罹豐遠
見參尋、至止阻濶、音塵殆絕、值暑遘疾、未旬卽
化、誠存亡命也、此行頗實有由、承凶感痛寔百
常情、紙墨幾時、非以斯名、蓋欽志節、追感平生、
自不能默已、故投懷援筆、其辭曰

仰尋形識、俯探理類、採聲知律、拔茅觀彙、物以
靈異、人以智貴、卽是神明、觀鑒意謂、爰初在稚、
慧心夙察、吐翬芳華、懷抱日月、如彼蘭苑、風過

氣越如彼天倪。雲被光發。求名約身。規操束已。
儻或遇世。曾未近似。生以意泰。意管生理。孰是
歡慰。程鄭趙李。家畜金縢。才練藝技。驤首揮霍。
繁絃綺靡。酒娛調促。意妍服侈。朝迫景曛。久忌
星徙。悠悠白日。淒淒良夜。年往歡流。厭來情舍。
苦樂環迴。終卒代謝。棄而更適。生速名借。誰能
易奪。何術推移。精粗渾淆。善惡參差。卽心有限。
在理莫規。試覈衆肆。庶獲所窺。道家躋近。群流
缺遠。假名恒誰。傍義豈反。獨有兼忘。因心則善。

傷物沈迷。羨彼驅遣。變服京師。振錫廬頂。長別
榮冀。永息幽嶺。含華襲素。去繁就省。人苦其難。
子取其靜。昏之視明。卽愚成絕。智之秉情。對理
斯湟。吝旣弗祛。滯亦安拔。子之矜之。爲爾苦節。
節苦在已。利貞存彼。以明闇逝。以慈累徙。欲以
援物。先宜濟此。發軫情違。終然理是。梁鴻携妻。
荷蓀見子。雞黍接人行。歌通已於世。曰高於道。
殊鄙。始見法師。獨絕神理。形壽易盡。然諾難判。
乘心卽化。棄身靡歎。懷道彌厲。景命已晏。矜物

辭山終身旅館。嗚呼哀哉。魂氣隨之。延陵已了。
鳶鷂同施。漆園所曉。委骸空野。豈異豈矯。幸有
遺餘。聊給蟲鳥。嗚呼哀哉。緬念生平。同幽共深。
相率經始。偕是登臨。開石通澗。剔柯疏林。遠眺
重疊。近矚嶇嶔。事寡地閒。尋微探蹟。何句不研。
奚疑弗析。帙舒軸卷。藏拔紙襞。問來答往。俾日
餘夕。沮溺耦耕。夷齊采薇。跡同心歡。事異意違。
承疾懷灼。聞凶懣悲。孰云不痛。零淚沾衣。嗚呼
哀哉。行久節移。地邊氣改。終秋中冬。踰桂投海。

永念伊人思深情倍俯謝常人仰愧無待嗚呼
哀哉

廬山慧遠法師誄

道存一致故異化同暉德合理妙故殊方齊致
昔釋安公振玄風于關右法師嗣沫流于江左
聞風而悅四海同歸爾乃懷仁山林隱居求志
于是衆僧雲集勤修淨行同法餐風棲遲道門
可謂五百之季仰紹舍衛之風廬山之隈俯傳
靈鷲之旨洋洋乎未曾聞也予志學之年希門

人之末惜哉誠願弗遂永違此世春秋八十有
四義熙十三年秋八月六日薨年踰縱心功遂
身亡有始斯終千載垂光嗚呼哀哉乃爲誄曰
於昔安公道風允被大法將盡頽綱是寄體靜
息動懷貞整僞事師以孝養徒以義仰弘如來
宣揚法雨俯受法師威儀允舉學不闕牖鑒不
出戶粳糧雖御獸爲萇楚朗朗高堂肅肅法庭
旣嚴旣靜愈高愈清從容音旨優游儀形廣演
慈悲饒益衆生堂堂其氣亹亹其資鬚角味道

辭親隨師、供奉三寶、析微辨疑、盛化濟濟、仁德
怡怡、於焉問道、四海承風、有心載馳、戒德鞠躬、
令聲續振、五濁暫隆、弘道讚揚、彌虐彌冲、十六
王子孺童先覺、公之出家、年未志學、如彼鄧林、
甘露潤澤、如彼瓊瑤、旣磨旣琢、大宗戾止、座衆
龍集、聿來胥宇、靈寺奚立、舊望研幾、新學時習、
公之勗之、載和載輯、乃修什公、宗望交泰、乃延
禪衆、親承三昧、衆美合流、可上可大、穆穆道德、
超于利害、六合俱否、山崩海竭、日月沈暉、三光

寢晰衆麓摧柯連波中結鴻化垂緒微風永滅
嗚呼哀哉生盡冲素死增傷悽單繫土槨示同
歛骸人天感悴帝釋慟懷習習遺風依依餘淒
悲夫法師終然是棲室無停響途有廣蹊嗚呼
哀哉端木喪尼哀直六年仰慕洙泗俯憚弔筌
今子門徒實同斯難晨擗虛房夕泣空山嗚呼
法師何時復還風嘯竹柏雲靄巖峰川壑如泣
山林改容自昔聞風志願歸依山川路邈心往
形違始終銜恨宿緣輕微安養有寄閭浮無希

嗚呼哀哉

謝康樂集卷之一終



